

BASES QUE REXEN A REALIZACIÓN DO DESFILE DE ENTROIDO 2026 EN A GUARDA

1º OBXECTO

O Concello da Guarda organiza o Desfile de Entroido 2026 co obxectivo de manter a tradición e promover a participación dos veciños da vila mediante grupos, comparsas ou carrozas que desenvolvan unha temática de Entroido común e coherente.

É obxecto desta convocatoria establecer os termos relativos á realización do Desfile tradicional de Entroido, tanto en itinerario, datas e horario como nas modalidades de participación e as axudas económicas previstas.

O Desfile de Entroido celebrarase o venres 20 de febreiro ás 20:30h. con Saída da Rúa Porto Rico e finalización na Rúa Rosalía de Castro. O itinerario será Rúa Porto Rico -Rúa Galicia – Rúa Rosalía de Castro – Alameda

En caso de choiva, o desfile quedaría aprazado a unha nova data que viría determinada pola previsión meteorolóxica mais favorable.

A organización resérvase a posibilidade de abrir un novo prazo de inscrición en caso de fixar nova data por criterios meteorolóxicos. Este feito anunciaríase no taboleiro de anuncios mediante resolución de alcaldía e estaría supeditado ás posibles baixas de participantes inscritos que a nova data causara. Os interesados en participar neste novo prazo, ateranse ás mesmas condicións, documentación e requisitos que aparecen nas presentes bases.

2º PARTICIPANTES E BENEFICIARIOS

Poden participar no Desfile as agrupacións de persoas físicas ou as persoas xurídicas (como asociacións, agrupacións culturais, escolas de bailes, etc.) que así o soliciten ante o Rexistro Xeral do Concello da Guarda entregando a documentación esixida e que cumpran cos requisitos previstos en cada unha das modalidades e categorías de participación, que se indican a continuación.

MODALIDADE CON OPCIÓN A PERCEPCIÓN ECONÓMICA

Contéplase tres CATEGORÍAS dentro desta modalidade:

- **CARROZAS:** Grupo mínimo de **12 persoas**, das cales polo menos 5 estean enriba dun ou varios móbiles, representando unha temática común debidamente decorado e que leven acompañamento musical (en vivo ou mediante megafonía)
- **COMPARSAS:** Grupo mínimo de **10 persoas** que representen unha temática común e leven acompañamento musical (en vivo ou mediante megafonía)
- **GRUPOS:** Grupo composto por un mínimo de **4** e un máximo de **9 persoas**

Os participantes en cada unha das categorías mencionadas deberán ir convenientemente caracterizados de Entroido: con maquillaxe e vestuario coidado e gardando unha coherencia temática entre si.

Deberán estar situados no seu posto de saída correspondente - que será indicado pola organización con carácter previo ao correo electrónico facilitado - con alomenos media hora de antelación, para garantir que o Desfile comeza con puntualidade.

Poderán ser beneficiarios destas axudas as asociacións legalmente constituídas e as persoas físicas que cumpran os requisitos establecidos no artigo 13 da Lei 38/2003, do 17 de novembro, Xeral de Subvencións.

MODALIDADE SEN OPCIÓN A PERCEPCIÓN ECONÓMICA

Existe a posibilidade de que se sumen ao Desfile de Entroido aquelas persoas ou grupos de persoas que queira participar de xeito voluntario e sen opción a percepción económica.

Este suposto contemplanse para persoas que queiran acudir de xeito individual, en parella ou en grupos de máximo 4 persoas.

Ao igual que na modalidade anterior estes participantes deberán ir convenientemente caracterizados de Entroido: con maquillaxe e vestuario coidado e gardando unha coherencia temática entre si, no caso dos grupos.

Esta modalidade non precisa de inscrición previa. Os interesados terán que presentarse na cabeceira do desfile 30 min. antes do horario de saída e informar á organización do desfile da súa participación, quen lles indicará o lugar reservado para eles.

En caso da participación de menores, estes deberán ir acompañados dos seus proxenitores ou adulto responsable durante todo o desfile, preferentemente disfrazado.

3º PRAZO E FORMA DE PRESENTACIÓN DE SOLICITUDES

O prazo de presentación de solicitudes comezará o día 3 de febreiro e finalizará o 11 de febreiro.

Finalizado o prazo de inscrición, publicarase no taboleiro de anuncios da sede electrónica do concello o listado de admitidos no prazo máximo de tres días hábiles.

Para poder participar no Desfile de Entroido deberá achegarse por Rexistro Xeral a documentación esixida na convocatoria (apartado 4ª das presentes bases) en calquera das formas establecidas na lei 39/2015 nos art.14. E 16.4 . De xeito que as asociacións ou persoas xurídicas están obrigadas a presentar a documentación a través da sede electrónica. En caso de que algún participante entregue a documentación por calquera das formas previstas no art.16.4 da lei 39/2015 deberá facelo constar enviando copia sellada que así o acredite ao mail cultura@aguarda.es antes da finalización do prazo de inscrición

4º DOCUMENTACIÓN NECESARIA

As solicitudes formalizaranse nos modelos normalizados que detallan a continuación, ademais da seguinte documentación:

- **Anexo I.** Formulario de solicitude debidamente cuberto e asinado pola persoa representante do grupo, carroza ou comparsa. Pode ser persoa física ou asociación/persoa xurídica.
- **Anexo II.** Declaración responsable de non estar incurso en incapacidades e prohibicións coa Administración para a percepción de subvencións, así como de estar ó corrente coas obrigas tributarias, co Estado, Xunta de Galicia, Concello de A Guarda e Seguridade Social.
- **Fotocopia do DNI** do solicitante ou en caso de asociacións/persoa xurídica o representante legal da mesma
- No caso de que o participante sexa unha asociación achegará fotocopia do CIF da asociación, ou de non ser posible, os estatutos.
- **Certificado de Titularidade da conta bancaria** , expedida pola entidade, asinada e selada.

- No caso da participación de MENORES DE IDADE:
 - Para a admisión de participantes menores de idade, en calquera das categorías, deberá achegarse autorización asinada polo pai, nai ou titor. (**Anexo III**)
 - **Cando tódolos integrantes sexan menores**, o representante do grupo será un dos pais ou nais, quen asinará a inscrición, aportará a copia do seu DNI e no seu caso, recibirá a axuda económica.
 - No caso de asociacións ou persoas xurídicas, poderán entregar unha declaración xurada na que se indique que contan coa autorización dos pais e titores para a realización de actividades fora da sede da propia asociación, adxuntando ó mesmo tempo seguro de Responsabilidade Civil na que se faga constar a cobertura con menores

Se os solicitantes non reuniran os requisitos esixidos nestas bases, requiriráselle para que subsanen as deficiencias en dous días hábiles, con indicación expresa de se non o fixese, teráselle por desistido na súa solicitude.

5º COMPENSACIÓN ECONÓMICA: AXUDAS Á PARTICIPACIÓN

Como compensación polo traballo e esforzo que supón a elaboración do atrezzo e traxes de Entroido, prevese o pago dunha contía fixa segundo ás diferentes categorías:

CARROZAS----300€

COMPARSAS---250€

GRUPOS-----100€

O crédito dispoñible corresponde á partida orzamentaria 33801.48000. por un total de 3600€.

Terán dereito ó cobro desta axuda económica as 10 primeiras carrozas ou comparsas que se inscriban, así como os 6 primeiros grupos, habendo a posibilidade de acoller mais participantes nas categorías indicadas sempre que o permita o crédito dispoñible.

O criterio de admisión verá determinado pola orde de inscrición que conste segundo o rexistro de entrada. Así mesmo o cobro destas axudas queda supeditado ó cumprimento dos seguintes requisitos:

- Terse inscrito previamente como participante no prazo indicado e coa documentación completa, según se recolle nos artigos 3º e 4º
- Participar efectivamente no desfile co número de integrantes indicado no momento da inscrición, e cumprir os requisitos mínimos que se recollen para cada categoría. En caso de que por causa de forza maior algún dos compoñentes non poida asistir deberá xustificarse esa ausencia. En calquera caso non se poderá participar cun número de participantes menor que os esixidos para cada categoría.
- Os participantes en cada unha das categorías mencionadas deberán ir convenientemente caracterizados de Entroido: con maquillaxe e vestiario coidado e gardando unha coherencia temática entre si.
- Cumprir cos horarios, lugares de colocación e indicacións dadas pola organización do Desfile.

O Departamento de Cultura será o responsable de levantar acta dos grupos participantes durante o desfile, dando conta do número de compoñentes e cumprimento das condicións de participación.

DISPOSICIÓN FINAL

O Concello resérvase o dereito para a captación e difusión das imaxes do desfile para fins de publicidade e promoción.